

Sanhgyangh:Citheiq Haeuj Hagdangz “Feihyiz” Daihdaih Cienz

三江:戏曲进校园 “非遗”代代传

5 nyied 16 hauh, youq Sanhgyangh Duncuz Swciyen Gujyiz Cin Cunghsinh Siujoyz, boux swncienz “feihyiz” sigaep Vuz Hijlonz son gyoengq hagseng boq venz.

Gaenh geij bi neix daeuj, Sanhgyangh Duncuz Swciyen roengzrengz guh hong citheiq doihaeuj hagdangz, dawz citheiq Duncuz、golaux Duncuz、yozgi Duncuz daengj bonjdieg citheiq yisuz yinxhaeuj cungh siuj hagdangz, daj dangdieg cingj boux “feihyiz” swncienz、boux dinfwngz ndawbiengz daengj boux conhyez lauxsae haenx dingheiz daeuj hawj hagseng hwnjdangz, sawj hagseng naj

doiq naj gamjsouh daengz gij rengzhoengh citheiq, youq daezsang hagseng vwnzva yisuz suyangj caeuq fungfouq hagseng youq ndaw hag lai cungj lai yiengh gvaq saedceij doengzseiz, rengzrwd doihaeuj mbanjranz “feihyiz” dinfwngz daihdaih doxcienz roengzbae.

(Gungh Bujangh/龚普康)

► Boux “feihyiz” swncienz haeuj hagdangz son gyoengq hagseng boq venz.



▲ Fwngz veh vwnzva conzdungj gyaendei Cunghvaz.

Gunghcwngz:

Saekheu Veh Hagdangz Gyaendei

恭城:绿色绘就美丽校园

5 nyied 19 daengz 20 hauh, Gunghcwngz Yauzcuz Swciyen Minzcuz Cunghyoz banh aen hozdung “saekheu veh hagdangz gyaendei—fwngz veh bangxcienz swnghdai”. Ngoenz haenx aen hag neix gyoengq hagseng dingj ndik dwk dawz gojgaeq vwnzva conzdungj gyaendei Cunghvaz yungh fwngz veh hwnj gwnz baihrog veizciengz hagdangz bae.

Gunghcwngz Yauzcuz Swciyen yawjnaek saedguh hong vwnzva conzdungj gyaendei Cunghvaz haeuj gihgvanh、haeuj lajmbanj、haeuj segih、haeuj hagdangz、haeuj giyez、haeuj ndawranz, gungganq caeuq saedguh sevei cujyi hwzsinh gyacizgvanh, cienzmienh daezswng gyoengq vunzlai swhsiengj daudwz suciz.

(Liengz Veih/梁辉)

Luzcai:Ndaem Makdauzbwn Coi Vutgungz

鹿寨:种毛桃促脱贫

5 nyied 16 hauh, Luzcai Yen Bingzsanh Cin Cayouz Cunh Mbanjbohcai aen nungzhoh singq Loz he hainduj sou makdauzbwn. Aen nungzhoh neix dwg hoh gungzhoj gendangj laebgaj, youq gwnz rinbya ndaem 30 moux makdauzbwn, aenvih hoh gungzhoj neix gaenx guhhong, vutgungz gietsim hung, gonqlaeng ndaej daengz cwngfuj 1.5 fanh maenz ndaem makdauzbwn boujdiep. Bineix makdauzbwn hainduj dawzmak, gujsuenq gai makdauzbwn cingh souhaeuj yaek mauhgvaq 4 fanh maenz, aen makdauzbwn iqet dauq ndaej sawj hoh gungzhoj saedyienh vutgungz.

(Lai Genveih/赖建辉 Dauz Gwzhauz/陶克豪)



▲ Gvanbaz angq sou mak.

Lozcwngz:Boux Dinfwngz Ndawbiengz Dawz “Feihyiz” Mulaujcuz Dik Hwnj Gwnz Rin

罗城:民间艺人把侏佬族“非遗”刻入石头



▲ Aeu aenmuzgok dik duzlungz.

5 nyied 15 hauh, youq Lozcwngz Mulaujcuz Swciyen Siujcanganh Cin Gingjih Dungzcunghdung, boux dinfwngz ndawbiengz 88 bi Cinz Cinfungh cingq yungh aenmuzgok “dik” aen gyaeuylungz. De naeuz aeu roengzrengz dawz gij doz ciet yihfan、foux lungzfiengz、ciengj giuz faexcuk daengj Mulaujcuz feih vuzciz vwnzva yizcanj dik hwnj rin bae, yawhbienh langhbaij rengzhoengh vwnzva conzdungj Mulaujcuz.

(Mungz Cwnghsw/蒙增师)